

忠烈

明李時勉上元人徙安福登永樂二年進士選庶吉士進侍讀上書言事構讒下獄踰年釋之洪熙改元上疏觸忌諱上震怒縛至便殿命力士以金瓜捶之折其肋幾死明日詔下獄宣德初上恨時勉觸仁考怒令縛來面鞠必殺之已又令王指揮縛時勉斬西市指揮出端西門先所遣使者已縛之從東門入得見上上訊之憐其忠直立脫桎梏復其官正統中遷國子祭酒訓勵諸生遇其困乏恩

義兼至王振惡其守正構陷之荷校國學門諸生石大用上章願以身代號哭闕下者數千人以故得解乞休去明年聞北狩號痛上疏言選將練兵迎駕復讐景泰元年卒謚文毅成化中贈禮部侍郎改謚忠文

王鑾字汝和隸籍錦衣衛舉正德辛未進士試政吏部時流賊甫平鑾爲原治二篇謂弭盜之本在禁奢立禮敦教化嚴貪墨太宰楊一清異之補文選主事秉公持衡不與人交接尋改考功節益峻朝散扃鍵自防人罕識其面晉驗封郎中武宗南巡

鑾上疏力諫廷杖致傷踰年卒士論惜之
何遵字孟循欽天監籍爲人任質不尚矯激之行居
常呐呐然於世故泊如也因自號曰味淡舉正德
甲戌進士授工部主事督商稅荊州荊故利府以
墨敗者相繼遵處之若無與己卯返命闕下武宗
頻巡幸逆臣江彬實導之逆藩伺變禍且莫測兵
部郎中黃鞏修撰舒芬等暨遵先後進諫彬怒矯
詔下鞏等獄且以死脅言者遵不顧復上疏言鞏
等無罪不宜誅諫臣語益剴切彬愈怒下遵於獄
榜掠瀕死復罰跪廷杖逾二日竟死遵之將諫也

上元縣志

卷二十

忠烈

二

貽書鄉人周金陳沂以親老爲託語不及私嘉靖
初錄遵忠贈尚寶卿廕一子爲國子生

張益字士謙幼穎異過目成誦少孤事母倪氏以孝
聞永樂十四年舉進士能書授中書舍人進評事
正統戊午改翰林修撰進侍讀學士知制誥尋召
入文淵閣叅機務日見委任賜金帶繡衣以寵之
是歲秋也先入寇上親征簡內閣重臣二人扈從
公其一也上木敗績公奮爭不屈以死贈翰林學
士賜謚文僖子翊大理寺左評事翔太僕寺丞奕
葉相承爲江南名族從孫琮弘治三年進士官至

右副都御史

王一居上元人自少讀書樂善初爲太常贊禮郎宣德初舉南郊禮一居禮度詳雅上嘉之遷少卿正統間死於王事贈太常寺卿

湯胤勣字公讓東甌王和孫少負才爲應天諸生與府尹不合輒攘臂去題詩學門有從今袖却經綸手且向江頭理釣絲之句周文襄奇其才疏薦京師于忠肅方督諸軍立試之摘古今將畧及兵事以問應答如流忠肅曰此文武材也入對以爲錦衣百戶後以裨師力戰孤山堡死之勣負氣不能

上元縣志

卷二十

忠烈

三

俯仰徇時好詩豪邁奇崛如其爲人

童仲揆字元圃孝陵衛籍萬曆戊戌武進士倜儻多大略猿臂善射有古名將風爲四川都司經畧熊廷弼聞其名疏調軍前屢立戰功後與石柱土官秦邦屏率師渡河衆寡不敵仲揆揮短兵接戰中弩死贈都督廕其子以振孝陵衛正千戶以振歷官陽電叅將死於陣

陳六奇字鳴驚上元人萬曆戊午舉人知雲南曲靖府南寧縣流寇內訌雲南大亂曲靖爲土酋所據知府焦潤生死之六奇號召義勇力窮被執賊欲

官之六奇不屈爲所害闔門殉節

張可大字觀甫一字扶輿京衛籍父如蘭以世胄中武舉第一人官至淮徐漕運叅將博極羣書談古今事如指掌凡陪京大利弊興革靡不條議見諸實用好學勵行動準古人可大幼警敏善騎射舉萬曆辛丑進士屢官右都督鎮山東勒王解都城之圍領專勅平島師劉興治之亂又建功於鐵山內陞左軍督府已得代聞兵變回登州爲戰守計值防撫誤信賊間奸人內應而登陷乃登署樓衣冠北向拜手刃愛妾題壁曰某年月日山東總兵

上元縣志

卷二十

忠烈

四

張可大盡節於此遂投縋死之事聞贈太子少傅特賜祠額曰旌忠謚曰壯節

論曰人之立身在朝無直言敢諫之氣卽臨難無捐軀殉國之貞李時勉上章觸忌諱瀕死王汝和諫武宗南幸廷杖何孟循言鞏舒輩諫臣無罪下獄可謂介於石矣土木敗績張士謙王一居及於難是殉君者也湯公讓裨師力戰童元圃短兵中傷其勇士不忘喪元乎陳鳴驚知南寧被賊執不屈闔門遇害張觀甫總鎮登州城陷衣冠北向拜手刃愛妾自署於壁古之烈丈夫殆如是哉

姚九疇字康元爲浦口守禦崇禎八年冬流寇破陽圍江浦九疇從遊戎汪之斌援浦乘障用火攻五戰皆捷斬賊亡去城賴以完之斌貪功議搜山九疇諫不聽果中賊伏九疇率所部往救出之斌於重圍賊麋至絃絕矢窮誘降不屈以刀脅之罵賊死大司馬吳橋范公爲卹其家先是戊午三路之師紅旗催戰南營帥姚國輔以遊擊將軍領銳卒三千赴援死焉登州之變鎮標千總姚士良請當一隊與遊擊陳良謨中軍管維城死於陣三姚皆南產其奮不顧身致命遂志略相類

上元縣志

卷二十

忠烈

五

潘可大金陵人起行間嘗建功齊魯又北援京師南援閩粵皆有功崇禎乙亥授安慶守備署游戎事是年流寇入桐灣可大訓練爲備偕道臣史可法四面堵截不解甲者數月與士卒同甘苦加叅將隨總兵程龍進勦遇賊於鄆家店時賊騎數萬而程所領纔三千餘人困守月餘矢盡營破度不得生乃取關防印襟袂數十處以身殉焉程亦自焚死史公招覓而哭爲立祠祀之事聞贈都指揮使廕其子

胥自修字二如萬曆壬子鄉薦授曲陽令豈弟廉能

爲三輔最丁艱起復補宜黃值奸民劫掠多方捕獲盡寘之法有夤緣縱以出柙者坐是與當事忤左遷衢州府檢校轉光祿監事尚未離衢值國變具冠服北向肅拜自是絕粒子弟微勸之不顧曰吾惟一死報朝廷而已城破爲衆兵刺死其孫時進扶柩以歸

劉旋字通生崇禎戊辰恩選授四川崇寧知縣任未一年流賊張獻忠從廣元寇蜀州縣望風遁旋誓死守賊至危坐堂上賊掖之下罵賊不屈賊怒剜目剔腎猶不絕聲事聞贈尚寶司司丞祀鄉賢

上元縣志

卷二十

忠烈

六

汪偉字叔度少儻負才遇事敢爲崇禎戊辰進士授慈谿令多異政邑有虎災偉禱於神而得虎自是山行無患戊寅擢檢討癸未分校禮闈得人最盛房首顧咸建同殉難孟章明其最著者荆襄失守偉知時事不可爲上江防綢繆疏一曰布置謂禦淮所以禦江守九江所以守金陵一曰用人謂守江當責督撫守城當責京兆一曰設處謂兵非舊額兵虧而餉不減水戰恃船船壞而費難措當擇壯勇丁舍以實伍整練兵船以助援凡條奏千餘言上嘉之甲申二月流賊逼近畿輔眞保督爲

叛軍縛去偉聞泣曰事至此乎作書寄陸給諫朗曰賊襲真定奸細滿都城外援不至大小諸臣無一人可支危亡如聖主何平時悞國之人終日言門戶而不顧朝廷之門戶終日言聲氣而不顧窮民之聲氣今日當何所伸其狂喙耶朝議又欲移史撫臺某正色曰諸公並江南亦不要耶弟死不足言南中諸老當思萬全之計可也三月十九日城破先一日偉繼室耿氏簡新製裋衣上下固縫以待偉因援筆題襟曰翰林院檢討汪偉繼室耿氏同死節次早城陷耿氏先投縋公捉筆大書壁

間云崇禎十七年三月十九日城陷翰林院檢討同繼室耿氏死節後書云身不可辱志不可降夫妻同死節義成雙江左汪偉絕筆復作家書寄長子觀勗以忠孝時耿懸於左偉熟視曰雖造次不可失序因移耿停於右自經有僕見之解繫復甦偉瞪目大罵扃戶復經而卒家人高霖棺殮之後賊遁縱火偉寓被焚將及棺內姪吳的哥懼不可保自縊柩旁須臾火滅兩棺得全子觀壬午舉人徐有聲字聞復多才伉爽崇禎辛巳廷試上奇其對擢戶部貴州司主事居官廉勤死闖難

梁志仁號罪玉保定侯銘九世孫登萬曆戊午鄉薦
壬申授衡陽守時流賊橫掠蘄黃中樞以公才調
知羅田公築城濬隍晝夜戒嚴賊帥有飛天王曹
操者知公清正令諸營勿犯界會邑豪汪猶龍通
賊公捕繫之獄龍知不免遣家奴潛引賊入公大
罵裂縛奪賊刀殺數人賊怒遂刃公於倪公祠妻
唐氏不屈死操賊方屯吳山聞之馳至羅田斬手
刃公者以錦綺斂公夫婦屍羅人哭之如喪考妣
建祠祀焉事聞贈蘄州知州

雷敬字肅公河南陳州人博學有智畧洪武初以武

上元縣志

卷二十

忠烈

八

功授指揮僉事建文朝累官南京總制督禁軍靖
難兵陷金川門敬率所部禦之不克力戰死之子
六長雲昇世襲龍驤衛指揮

吳可箕上元太學生甲申國變可箕具酒食召親友
言別衆莫測其意已乃製白衣題詩於襟入英靈
坊關帝廟闔殿扉自縊而死同時有孝陵衛董啟
明者聞變自縊樹下妻王氏與子女俱死武舉黃
士彩素行佻達頗不爲鄉里所重至是亦題門自
經死

論曰明之天下非流賊亡之明自亡之也當是時

閹奸繼踵賦亟刑煩諸老當國者率泄泄然坐視其猖狂而莫知所措徒使任師旅者或以力盡而死捍牧圉者或以城破而死其死也或夫婦同縋或闔門遇害後之人哀其節以想見其爲人不知其涕之奚從也予觀姚九疇等八人傷矣然猶可曰履行陣也食君祿也吳可箕太學生耳甲申聞變具酒食召親友言別白衣冠自縊於關帝廟殿則又祖宗養士之報而然也其如孫子何哉

國朝

董三策康熙癸丑武進士授萬州遊擊值寇亂檄策

上元縣志

卷二十

忠烈

九

勦寇於安定策血戰百里恢復縣城窮危搜險深入黎洞中中毒身仆猶口呼殺賊而死

顧來鶴字和之由武舉歷仕都司僉書管陝西寧夏中衛守備 潘煽亂來鶴召募鄉勇防守甚嚴繼賊勢益張援兵不至城遂陷來鶴大罵不屈死之事聞 贈遊擊將軍蔭一子千總

論曰有明之忠烈章矣

國朝膺天景運士生其際黼黻休明何幸如之董三策窮搜黎洞賊顧來鶴不屈吳藩其亦烈風知勁草之謂與

楊光弼號次公庚辰科武進士沉旌多胆畧任三江營都司甲申之變有王翁者爲逆僕恐嚇遂溺於水光弼籍其舟中貲巨萬召翁二侄還之累官副將乙酉春總兵賀固邀偕去光弼曰事閣部十二年一旦去之安知異日不去大將軍乎賀曰眞義人也後總督徽嚴衢等處駐師江郎丙戌秋偕族叔副將賔王從弟遊擊光宙同盡節而死曾孫文知邑庠生

劉斌字太修順治戊戌武進士授湖廣鄖陽守脩調竹谿值吳逆亂矢志不屈乞師以勦賊時賊攻寨

上元縣志

卷二十

忠烈

十

急妻周氏固守脫簪珥易糧兵感奮憑高發擗石七戰傷賊千餘 詔加副將斌力戰死子銓性孝貧無嗣

卜世儼字若思康熙甲辰科武進士初任貴州鎮遠衛守禦到任未及一載值吳三桂之亂世儼從容殉節投繯以歿事聞贈都司僉書廕一子山西太原衛千戶賜祭葬銀三百兩康熙四十六年三月聖祖仁皇帝南巡特賜盡節邊疆匾額以旌之子數年亦卒遂乏嫡嗣曾侄孫士恒承祀乾隆二年奉特旨入學宮忠義祠春秋丁祭並祀

姜山上元人仙霞嶺叅將康熙十三年遭耿逆變被
執不屈罵賊死妻孺氏子文玉媳田氏聞信闔戶
自縊總督郭公世隆題 旌贈浙江衢州府副總
兵